

沈石田集

埽葉山房
石印

石田先生集

長洲沈 周啟南著

後學錢允治功甫校

陳仁錫明卿編

七言律三

笑雲為瑋上人賦

閒雲堪愛何堪笑。應是吾師閒勝雲。千態可憐翻手變。半閒那肯為予分。浮生擾擾徒勞爾。此意悠悠難贈君。撫掌開門成絕倒。秋陰狼藉又斜曛。

送郭忠恕歸江西郭安府客

江左詞名已漫傳。春來歸思遠臨川。馮驩豈可為無伎。毛遂終非是備員。醉倚酒杯歌楚曲。自挑書篋倩吳船。長裾又向王門曳。臨別何須重惘然。

聞文宗儒桑民澤兩進士同宿三茅道院

兩人相別兩年間。此地同遊想未還。李主高談聞雨肆。陸郎幾宿共春山。槽家有酒青蚨便。道院無人白日閒。縮地何由陪勝賞。碧雲離思遶江關。

壽王勉時六十

雅懷如水澹無塵。閒把流年學種椿。秋谷地靈居子午。虛堂神靜守庚申。每修藥物因資壽。近註丹經欲授人。鬚鬢黝然今六帙。笑將明鏡照青春。

送韓世資

十年吳下始歸來。鷗鷺紛然滿釣臺。落日長天休倚劍。浮雲故國且銜杯。芙蓉雖是秋江物。參朮宜非藥籠材。束取舊裝仍作客。扁舟北去一帆開。

和天全侗軒留別錢氏祖席韻

悵飲溪船奈別何。風流偏向老年多。過橋野色花饒笑。隔葉新聲鳥闕歌。人惜餘權難作別。酒兼殘醉易生醅。白頭給事今疎放。已覺山林異諫坡。

送范景仁入胄監

高遊壁水曳長裾。文獻家聲衆不如。九月授衣秋雨後。六堂親火夜涼初。須知憂樂先公事。好讀都俞伏父書。今日青雲從此去。野人著笠看乘車。

和韻沈廷佐病起

年來何事不逢君。應把醫經立傳文。鬚髮病餘當類雪。情懷閒在好如雲。供食

每具魚蝦味。惜黍頻驅鳥雀羣。遙想東林覓詩地。幾行高樹映斜曛。

許關訪劉蓮幕告夫

關征何事久勞賢。自是廉能得兩全。出郭暫拋蓮幕事。看山就算水衡錢。朝耕
首宿清官飯。晚市魚蝦估客船。海上書生來問訊。好音先聽路人傳。

筠雪次陳育菴韻

雪裏移居為竹竿。不因住長安。梁園握管休誇賦。灞上騎驢好借看。莫道

臨門無玉節。錯疑開徑到瑤壇。知君自寫瀟湘意。先煮茶杯敵夜寒。

與陳育菴遊虎丘次韻

蕭條林壑亂雲浮。出郭尋山到水頭。草木漸隨西候變。風光何似昔年遊。兩人
登塔休誇健。雙鬟臨池已覺秋。且拂生公講臺石。將詩同向醉時留。

和韻張翰林亨父見寄

故國全拋負郭田。年來供奉近爐烟。東方疏有三千牘。杜曲家惟尺五天。詞翰
新聲傳樂府。江湖餘問及漁船。滄洲吾道君休顧。老懶而今只醉眠。

和韻沈廷佐留別

東林嘉遜示無能。却有清篇瑩壑氷。清世白頭嗟自棄。少年黃甲看人登。門蟬
細葉號秋樹。磎鳥殘花啄晚籐。今日幽居接高論。不眠同對雨中燈。

贈陸古狂和陳育庵韻

新買胡綿絮客衣。鱸魚鄉裏正堪依。北音漸逐吳人改。南國頻看朔鴈飛。旅館
秋風箋劍說。僧房寒雨話棋機。憑誰識得男兒事。李子金多始是歸。

姑胥臺

姑胥遺業有荒臺。今日登臨尚可哀。千載苞桑天子棄。六宮芳草美人裁。南飛
鴻鴈秋風早。西向山川夕照開。流水梧桐幾番夢。獨憐孫聖不重來。

不出偶成

落葉蕭條秋盡時。竹寒深掩舊茆茨。自憐宣子居貧久。莫怪申生見客遲。黃雀
野田無滯穗。白魚溪葉有垂絲。浮雲不管門前事。漫費功夫自學詩。

祝大參七十

懶參簪政憶漁磯。七十東還步似飛。自信楚丘吾始壯。莫言工部古來稀。山家
看竹鳩頭杖。雪圃尋梅鶴羽衣。今喜高堂對春酒。烏紗白髮兩相輝。

東莊為吳匏庵尊翁賦

東庄水木有清輝。地靜人閒與世違。瓜圃熟時供路渴。稻畦收後問隣饑。城頭日出啼烏散。堂上春深乳燕飛。更羨賢郎今玉署。封恩早晚着朝衣。

陶菴

東林却種柴桑菊。亦把庵居扁作陶。濁酒寒香同淡薄。南山秋色兩清高。黃生有意求居易。優孟于今似叔敖。果籍此花成隱逸。秦人堪笑錯栽桃。

七夕

百拙冥冥一病身。看陳瓜果記良辰。人皆去乞天孫巧。我自能甘阮氏貧。河轉層城知夜久。露侵高樹覺涼新。枕頭愧有殘書在。潦倒于今博睡頻。

送文宗儒尹永嘉

載書作縣一輕車。任喜南方且近家。山上層城連北斗。海邊名郡說東嘉。吏疎牘事常無訟。鳥下公庭早散衙。此去三年成卧治。試看鷗鷺到金沙。

蕉窓為惠公賦

禪房淨植不生塵。綠玉陰陰蓋四隣。鄭客遂為真實夢。維摩聊示不堅身。疎櫺

度雨秋聲早。彩筆題烟墨色新。愧我才非王右軍。雪中難貌舊精神。

送張用宜入醫垣

參芝一籠伴吟身。隨薦迢迢入紫宸。行李不須愁客路。醫垣多半是鄉人。揚鞭走馬山程晚。九藥聽鶯苑樹春。遙想生涯隨處好。金臺重見杏花新。

送陳祖賢展省還楚藩

闔閭城郭鴈聲前。只暫相逢又別筵。楚客自憐庄舄老。梁王偏愛賈生賢。莫嗔白髮今霜鬢。得掃松楸已十年。何苦長裾不容挽。秋風催發五湖船。

和王秋官元勳病中寄王維顥韻

卧起楓林葉亂飛。淡雲新月兩依微。庭前除草驚虫語。窓下燒茶阻鶴歸。楔飲久違王逸少。畫顥猶類米元暉。緘題為報相思候。白萱都寬舊着衣。

友人下第

桂遠天高與願違。芙蓉花發又東歸。惜無老父呈秋卷。喜有賢妻下曉機。並水獨憐魚自泳。掩書閒看鳥爭飛。移文好報山靈道。依舊江東一布衣。

寄題江口王廷信家黃荷花

九疑竒種露香新。渥柘凝梳認未真。漢女淺粧初映額。潘妃微步不生塵。綠衣
此日甘為裏。紅幕于今悔作賓。更使仙標兼月色。倚闌添口夜遊人。

對堂下老桂憶亡弟繼南

百年嘉樹淮南物。世遠無陰蓋草堂。聊有旁枝表秋色。可勝今雨送寒香。故園
已覺黃金少。往事空驚白髮長。竹馬青衫舊遊處。看花憶弟最堪傷。

和方水雲秋思韻

蕭蕭楊柳風連樹。浙浙蒹葭雨滿塘。南國浮雲何日定。東流之水為誰忙。今年
白髮驚新種。在處黃花認故鄉。莫道經秋思寥落。浩歌猶足送吾觴。

訪范山人不遇

振衣繫纜岩石下。薄午扣門仍返關。扁舟森度浩三水。主人出來空兩山。行憐
花落小雨後。坐愛烏啼芳樹間。記名何必上高竹。自有白雲知往還。

虎丘餞別半隱次韻

城外尋山風日清。好山原不離江城。真娘墓上花無主。短簿祠前鶯有聲。烏帽
也宜筇竹瘦。白頭還惡酒波明。羨君又向苕溪去。我活苕溪夢亦生。

中秋客中

客裡秋光已半過。月華如此思如何。囊空不愧黃金少。親老偏憂白髮多。庭下殘蕉翻夕露。城頭高樹隱明河。故園今夜堂前酒。應閣清尊待我歌。

馬秋官抑之養病還吳

仙郎喜出白雲司。似此知機更許誰。未即燒丹尋萬令。先須煖玉買燕姬。貪眠怕踏霜朝鼓。賭酒常輸野客棋。自愛欲閒閒便得。況看雙鬢早如絲。

送呂通府乃姪還浙

籍牧居官路不賒。阿咸來往亦如家。思家忽咏南枝鳥。為客因逢九日花。震澤秋高風滿棹。錢塘潮淺月籠沙。遙山積水經行處。行處題詩感物華。

陪呂府倅華節推九日登姑蘇臺次韻

重陽弔古上蘇臺。伯業于今安在哉。城郭西邊秋嶂合。海門東向暮潮回。白頭對酒身猶健。黃菊無言客自來。敢學秦軍狂落帽。不妨高咏好開懷。

其二

佳節登高有古臺。羣公暇日興悠哉。東南大鎮才堪倚。西北長安首重回。細雨

漫教頭上過浮雲不向日邊來詩成白雪真難和且對清尊笑口開

復陪二公謁伍相祠次韻

忠臣有廟千秋祀伯業無踪一餉烟入幕靈風猶颯颯侵階細草自芊芊存亡好在鵝夷內慚愧當於蠅目前倚壁題詩重惆悵寒鴉飛散夕陽天

其二

城頭五相祠堂好眼見香爐生紫烟吳沼已成花寂寂楚陵何在樹芊芊一時遺事十年後此日清談斗酒前落魄布袍冠蓋末悲歌亦得倚秋天

和王元勛所寄武揮使韻二首

雨浥江城不動埃鶴汀鳬渚濕生苔雲開落日千峯出江引寒潮百里來報盡郵籤初倚棹撥殘燈火細傳杯將軍油幕閒無事座上惟應酒令催

其二

百雉昏鴉望海城城邊繫纜夕陽晴烟荒古戍秋無警風雜寒砧夜有聲莫信杜陵多好句惟於鄭國見高情酒杯不盡深留戀江水茫茫別思生

溪山樂趣

碧溪一道帶青山。家住溪光山色間。波面草深魚隊亂。門前花落鳥聲閒。每輕捷徑非真隱。不為移文有厚顏。鎮日垂簾春雨裡。茶經香譜事重刪。

十一月十六日陪味芝陳先生遊奉慈庵

細路輕輿兩兩乘。招提深入亂雲層。青山影裡蒼髯叟。黃葉林中白髮僧。戲寫玉茶思舊到。醉嘗金橘記重登。詩成謬寫高崖石。不覺獼猴上古藤。

題杜東原先生畫

杜翁畫幃依然好。手拂遺塵認翠微。芳草扁舟春水漫。長松高閣亂雲飛。只今韋曲無人住。何日遼東有鳥啼。江上愁心正千疊。不堪題句對斜暉。

和丘二所寄詩韻

南國音塵久不知。客邊偶得寄來詩。雪深千里淮陽道。鴈度孤城歲暮時。握手未開離思緩。燒重讀讀夜眠遲。情多辭妙愁難和。沈約明朝帶欲移。

虹橋別業為陳世本賦

名園綠水新分業。買地虹橋似故居。窓裏碧紗籠野馬。案頭青竹走書魚。誦聲夜靜兼隣織。圃事春忙率子鋤。市上開門亦堪隱。酒爐何悔學相如。

次張廷采韻再賦虹橋別業

愛爾虹橋新業好。城中心遠即江湖。黃金寸地雖能買。綠竹千竿不可無。俗事從今莫相染。浮名在世不宜沽。吾居自信吾何下。亦笑三閭楚大夫。

寄光福徐山人

複嶺重湖皆畚畫。虎山橋畔記曾來。蘭名翡翠家家有。盧橘楊梅得得栽。迂迂入林藤轡穩。泱泱沿澗羽觴迴。白頭徐穉高情在。深竹衡門候客開。

留王元勳

歲晏蓬門雨雪頻。留連信宿見情真。莫憑後會能輕別。已說明年是遠人。曉閣壺觴還繼火。寒原草木漸知春。繫舟費日君休惜。漫有詩篇發興新。

送道士還俗

侍香何故憶人間。流水桃花送出關。琳館石房嫌夜冷。林田瓜圃惜春閒。仙都白日無緣住。世路紅塵帶笑還。留得松梢滴殘露。別研螺黛畫眉山。

遊磧砂寺

雙幢落日倚漁汀。北下孤舟此暫停。野客偶驚門外犬。老僧隨掩石邊經。沙洲

古樹藤蘿紫。火殿遺基薺麥青。今夜試留湖上枕。疎鐘高浪不堪聽。
復用前韻送王元勳還京

莫怪離亭倡和頻。亭中逸少本清真。布帆風熟開長路。別酒杯深看醉人。紫燕
綠帘輕拂雨。白鷗青草淡分春。雲司久矣淹文彥。九棘應知拔擢新。

覺海菴次趙大參韻

石徑登登深復深。重村已過見青岑。當門細草生山足。夾磴飛花落水心。萬壑
烟霞真樂國。百年鐘梵古叢林。老僧為掃莓苔壁。勸我題詩記重尋。

覺海早興

茆峰舊到今又宿。一夜頓忘行力勞。隔橋虎跡林雨過。聒枕鳥聲山日高。自知
狂客興不淺。豈是老禪吾愛逃。悠然竹閣盃嗽際。恰有微風吹鬢毛。

和陳育庵山行

青梅薦酒愜詩喉。連日山中取次遊。石面泉名書迹古。巖前香炷佛龕幽。叅林
高木能人立。接磴浮雲似水流。採得路傍黃躑躅。也堪簪上醉翁頭。

宿田翁賦韓克讚兄自號

老倒秋田計不成。金房無寶露晶熒。乾坤浩浩存糠粃。草木悠悠寄姓名。獨愧
素餐無少補。還留寸地待深耕。嗟予本是溝中斷。歲晚相逢認弟兄。

南湖為華文燾賦

南湖盡是君家物。今代風流賀季真。青草扁舟落吾手。白鷗萬里屬何人。玻璃
倒見波心月。翡翠平開雨裡春。我唱竹枝三十首。明朝相約伴垂綸。

客有母老久不歸省以此寄之

十年漂泊獨堪嗟。別日慈親髮已華。夜半還家憑夢裡。門前滿眼是天涯。春襟
定有忘歸草。秋燭難憑卜喜花。聞道子規能勸客。只應啼不到三巴。

附韓宿田遣子問病

秋水浸門秋日長。四簷雨脚更浪浪。庭鷄啄虫豆花落。山妻啖兒梨糝香。故人
十筐遣子送。多病百憂令我忘。韓符况是讀書者。清話共消燈燭光。

送客

在家十日不送客。阿段開門驚繫船。籬根黃葉雨迹爛。池上紅籠波影鮮。把杯
細問別來事。剪燭謾妨今夜眠。人生良會苦莫久。送子仍歌携手篇。

和陳味之壽古景修七十韻

養生滋味在松腴。七秩顏丹尚渥如。短鋤春泉營圃事。深簷晴日課兒書。湖山傲晚林君復。丘壑高閒謝幼輿。不獨幽踪遠城府。詩筒久亦與人疎。

維陽弔古

眇眇平蕪漠漠沙。土人猶說舊繁華。流鶯小店春將半。瘦馬荒城日易斜。此地錦帆無昨夢。何年瓊樹有新花。月明今夜江橋客。因聽簫聲倍憶家。

陪程諭德李武選吳修撰遊虎丘次諭德韻時有淮人送豆酒至

送別尋嘗到武丘。斯文何似此迴遊。峰頭春閣臨飛鳥。天際雲帆見遠舟。美酒試嘗淮市豆。新詩聊戲薛公油。座中詞客皆豪俊。不數當時趙倚樓。

送程仁民省親陝西

匣劍囊琴促曉程。關山迢遞不辭行。三邊斧節尊公令。千里庭闈阿子情。吳苑聞鶯春酒熟。秦川走馬暮雲平。胡兒北遁無烽火。滿地農歌慶耦耕。

清明隆阡遇雨

清明真見雨紛紛。滴瀝林梢雜澗聞。仰面傷心無白日。低頭揮淚有孤墳。松根

絮酒澆新土。嶺外棕衣裹濕雲。歸路何堪夫向晚。紙灰飛起鳥成羣。

以椿芽茶分餉周宗道速其詩答

椿芽清比詩中咏。不見將詩作報瓊。解失龍山猶有補。

孟嘉落帽有嘲之者嘉作解嘲其文不傳東坡

為補之。罰貪金谷故無成。香魂抱雨憑何弔。靈藥涵春想浪烹。借問南樓燭花底。

長髯曾斷幾霜根。

和吳太史贈陸允暉詩韻因題

疊嶂真看隱太行。眼中能事少人方。細憐草木爭春色。淡覺雲烟入練光。弟子早誇韓入室。老夫堪笑鮑當場。美人最是吳修撰。清句臨風振水蒼。

瑞蕉為朱景南賦蓋景南以孝旌門而蕉有花人以為瑞

朱家孝子旌門日。蕉本猶知雨露春。十扇絲光風葉大。三危甘露露苞新。王槐有兆還憑物。冠竹重生好在人。今喜此花開此第。牡丹一掃洛陽塵。

送趙中美遊西湖

十年不踏臨安路。今日因君省舊遊。山鳥山花當好在。西湖西子似前否。也知

行樂多紅拂已倦追歡有白頭。繫纜石邊春酒醒。別苔應見短題留。

送陳嘉言赴洞庭徐氏館

洞庭三萬六千頃。看泛圖書入渺茫。魚鳥依人聽絃誦。雲霞隨地發文章。山連綠橘秋當座。湖浸青氈月滿堂。徐孺陳蕃互賓主。酒杯相對賦滄浪。

會褚昌胤

與君近住不相逢。客裡清談入笑容。水郭方舟燈次酒。江村斜月夜分鍾。雖憐海兗勞民事。且喜天台遠縣封。欲辦青鞋訪桐柏。未知何人定相從。

過席心齋道士墓

丘墟寂寂臨川上。桑海茫茫感蛻餘。舊用素盤靈霹靂。新來劍地入耒鋤。羽人欲化楓林老。仙鶴無言石表虛。我願追求金薤橐。碧苔狼籍漫虫書。

送劉獻之還遼陽兼寄賀黃門

江右遼陽皆故國。往來宜有異鄉愁。松楸桑梓知求舊。烟水雲山豈好遊。暑滿客衣更白苧。書裝歸篋買華輜。煩君問訊黃門老。魏闕關心幾許憂。

謝松江陳廷璧紫竹屏